



PREZIDÊNCIA
KONSELLU
MINISTRUS
VIII GOVERNUN KONSITUSIONÁL



Gabinete
Porta-Voz

Komunikadu Imprensa

Sorumutuk Konsellu Ministrus nian iha loron 21 fulan-dezemburu tinan 2020

Konsellu Ministrus hala’o sorumutuk iha Palásiu Governu, iha Dili no aprova ona, ho alterasaun sira, projetu Proposta Lei kona-ba **enkuadramentu Orsamentu Jerál Estadu nian no jestaun finanseira públika**, ne’ebé apresenta husi Ministru Finansas, Rui Augusto Gomes. Projetu Proposta Lei ne’e propoin enkuadramentu foun ida ba Orsamentu Jerál Estadu nian no ba jestaun finanseira públika, hodi substitui Lei n. 13/2009, loron 21 fulan-outubru, kona-ba Orsamentu no Jestaun Finanseira. Projetu Diploma ne’e inklui alterasaun lubun ida no hadi’a rejime Orsamentu Jerál Estadu no jestaun finanseira públika nian, atu nune’e aumenta klareza, estabilidade, fleksibilidade no transparénsia. Diploma ne’e fó atensaun liu ba alterasaun sira kona-ba definisaun perímetru orsamentál nian, ba planeamentu orsamentál plurianuál, ba adosaun orsamentasaun tuir programa sira, ba rejime prorrogasaun Lei Orsamentu Jerál Estadu nian, ba rejime ezekusaun duodesimal no ba melloria informasaun orsamentál ne’ebé prodús ona.

Aprova ona mós, **alterasaun dahuluk ba Dekretu-Lei n. 48/2020, loron 7 fulan-outubru, ne’ebé adota medida sira ba apoiu ba família sira, ho atribuisaun ida “Sesta Bázika” nian, no ba operadór ekonómiku lokál sira, iha ámbitu Planu Rekuperasaun Ekonómika, no kria Rejime Espesiál Aprovizionamentu nian ba ida-ne’e**. Projetu Dekretu-Lei ne’e apresenta husi Ministru Koordinadór Asuntus Ekonómiku, Joaquim Amaral. Esperiéncia iha aplikasaun diploma nian, liuliu liuhusi atividade sira ne’ebé dezenvolve durante faze pilotu, hatudu ona nesesidade hodi halo alterasaun balu, ho hanoin atu fó solusaun normativu sira ne’ebé maka hatuur ona iha diploma ho ezequibilidade no efikásia ne’ebé boot liu.

Konsellu Ministrus aprova ona projetu tolu Rezolusaun Governu nian, ne’ebé apresenta husi Ministru Administrasaun Estatál, Miguel Pereira de Carvalho, ba nomeasaun sira Olivio Freitas ba kargu **Presidente Autoridade Munispál Baukau**, Domingos Savio ba kargu **Administradór Munisípiu Lautein** no Januário Soares ba kargu **Administradór**



Palácio do Governo,
Avenida Presidente Nicolau Lobato,
Dili, Timor-Leste



PREZIDÊNCIA
KONSELLU
MINISTRUS
VIII GOVERNUN KONSTITUSIONÁL



Gabinete
Porta-Voz

Munisípiu Vikeke. Sira ne'ebé daudaun ne'e nomeia sei hala'o kargu iha rejime komisaun servisu nian, iha período ida tinan lima nian, sura husi loron simu pose.

Governu delibera atu propoin ba Sua Exelénsia Señor Presidente Repúblika, Francisco Guterres Lú Olo, **renovasaun ba estadu emergjénsia nian**, ba loron tolunulu tan. Haree ba evolusaun husi situasaun epidemiolójika no proliferasaun ba kazu sira ne'ebé regista ona husi kontájui COVID-19 nian, iha nivel rejionál, no mós iha nivel mundiál, atu evita no neutraliza risku sira husi propagasaun SARS-CoV-2, atu nune'e bele proteje saúde públika no iha kbiit atu hatán ba Sistema Nasionál Saúde nian, Governu propoin ba Señor Presidente Repúblika katak, ho renovasaun estadu emergjénsia, permite atu suspende ka limita direitu sira kona-ba sirkulasaun internasionál, husi sirkulasaun no husi fiksasaun rezidénsia no rezisténsia nian.

Vise-Ministru Saúde, Bonifácio Maukoli dos Reis, apresenta ona ba Konsellu Ministrus informasaun kona-ba **esforsu sira Governu nian ba akizisaun vasina sira kontra COVID-19 no mós kona-ba planu distribuisaun vasina iha Timor-Leste**. Tuir informasaun sira ne'ebé fó sai husi Señor Vise-Ministru Saúde, Governu halo esforsu hotu ne'ebé nesesáriu, ho apoiu husi parseiru dezvoltamentu nian, atu haree ba akizisaun vasina sira kontra COVID-19, no mós ba preparasaun planu ida ba introdusaun no distribuisaun vasina ida ne'e iha Timor-Leste.

Ikus liu, Ministru Edukasaun, Juventude no Desportu, Armindo Maia, halo **aprezentasaun preliminar ida kona-ba apresiasaun projetu kooperasaun iha área desportu nian**, entre Ministériu Edukasaun, Juventude no Desportu no Ajénsia Internasionál kooperasaun Koreia (KOIKA). Projetu ne'e, ho valór dolar amerikanu millaun 6,5, atu aumenta partisipasaun labarik no foin sa'e sira iha desportu, liuliu iha modalidade futebol, liuhusi konstrusaun infraestrutura nian. **REMATA**



Palácio do Governo,
Avenida Presidente Nicolau Lobato,
Dili, Timor-Leste